

四庫全書

子部

欽定四庫全書

子部
居易錄卷八

詳校官侍讀_臣陳崇本

員外郎_臣牛勣文覆勘

總校官中書_臣朱 鈐

校對官中書_臣方大川

謄錄監生_臣何茹連

謄錄監生_臣范光謙

欽定四庫全書

居易錄卷七

刑部尚書王士禎撰

村歌聒耳烏鹽角社酒柔情白練槌宋末月泉吟社中
佳句也山居雜志載杭人徐炬酒譜乃引作少陵詩不

辨格調之類否而妄稱予美則號國夫人杜鵑行

黃鶴陳浩

然二狂歌行

裴煜所收

諸篇妄人皆雜入杜集又何怪乎

古名酒皆以春名如竹葉春梨花春松醪春石凍春之
類今關中之俗尚如此西安酒以漢波春為第一

今大臣

賜諡京朝官惟閣臣尚書總憲得請侍郎副憲已下多無之侍郎如葉文敏方藹沈文恪荃以久在侍從宋端慤文運以廉介受知加太子少保

特予諡

捫蝨新話云琴有古人之雅琴頌琴蓋古之為琴皆以歌乎詩古之雅頌即今之琴操耳舜南風歌楚白雪辭本合歌舞漢高帝大風歌項王垓下歌亦入琴曲今琴家遂有大風起

力拔山操文中子與楊素蘇瓊李德林語歸而援琴鼓蕩
之什乃知其聲至隋末猶存予嘗不解雅琴頌琴之義見此
了然然不知何以獨不言風耳

捫蝨新話云柳子厚壽州安豐縣孝門銘云云以表為序
而徐鉉所編文粹乃錄銘于前而于題下注云并壽州刺史表
此鉉之陋也云云按文粹吳興姚鉉所撰陳善以為鼎臣謬
予遊廬山唯白鹿洞開先寺古碑刻最多萬杉寺乃宋
仁宗所建而碑刻絕少相傳有仁宗御書亦不復存唯

石上有龍虎嵐慶四大字云是宋人槐京書殊無文義
適讀程史見張孝祥與王阮同遊萬杉賦詩張云老幹
參天一萬株廬山佳處著浮圖祇因買斷山中景破費
神龍百斛珠王云昭陵龍去奎文在萬歲靈杉守百神
四十二年真雨露山川草木至今春阮詩號義豐集
桑御史喬作廬山紀事極簡潔而不收此予匆匆題
五言一篇云晨過玉京山緬想陶公里谿迴得寺門
曲折松杉裏雨中念佛鳥交語清人耳風吹修竹林

下有寒泉水爾時未覩二公詩又不詳仁宗建寺始末
故畧之殊以為憾

元祐中舒州有李亮工以文鳴與蘇黃遊又有李元中
字畫之工追蹤鍾王與李伯時號龍眠三李同年登進
士出處相若今人但知伯時而已

章惇之父俞邠公族子早歲無行妻之母楊氏早寡俞
與之通已而生子以一合置水緘置其內持以還俞俞
得之云此子五行甚佳將大吾門既長登第即惇也東

坡先生送其出守湖州詩云方丈仙人出淼茫高情猶
愛水雲鄉惇以為譏已怨之紹聖中為相坡渡海蓋修
報也所謂燕國夫人獨處而無耐者即楊氏也揮麈餘
話載之甚晰一惡少通妻之母又生子而育之遂至流
毒天下禍及人國噫妖孽哉又惇舉進士在京師館郇
公第私族父之妾包希仁尹開封罰贖銅見溫公所
記云

刻書咸云始于後唐明宗予池北偶談已備考羣說適

讀揮麈餘話云母邱儉貧賤時借文選于交遊間有難色發憤異日若貴當板鏤之遺學者後仕蜀為宰相遂踐其言刊之印行書籍創見于此事載陶岳五代史補唐平蜀明宗命太學博士李諤書五經倣其製作刊板于國子監監中印書之始今盛行于天下蜀中為最昨清家有謬書印本五經後題長興二年予考常熟毛氏刻五代史補無此條吳太史臣任十國春秋蜀母昭裔傳請後主鏤板印九經又令門人句中正孫逢吉書文選

初學記白氏六帖刻板行之錄誤昭裔為母邱儉耳

唐詩人人多慕而寫之傳于畫圖如王右丞畫孟浩然吟詩圖之類故白太傅詩云兼聞好事者畫我作屏風前蜀房從真嘗畫常建冒雪入京圖見圖繪寶鑑王仲言揮麈前後四錄著宋賢前言往行最悉又嘗疵碧雲騶江南野錄二書不可信而其書極述曾布相業之賢蓋仲言父銍乃布孫壻也布與京惇輩同列奸臣傳錄之云云又可信哉

稗官小說不盡鑿空必有所本如施耐菴水滸傳微獨
三十六人姓名見于龔聖予贊而首篇叙高俅出身與
揮塵後錄所載一一脗合俅本東坡先生小史工筆札
坡出帥中山留以予曾子宣辭之以屬王晉卿晉卿一
日遣俅送篋刀子于端王邸值王在園中蹴鞠俅睥睨
之王呼來前詢曰汝亦解此耶曰能之令對蹴大喜呼
隸云往傳語都尉謝篋刀之貺并送人皆輟留矣踰月
王登大寶眷渥日厚不次遷拜數年間持節至使相父

敦復復為節度使兄伸亦登八座子姪皆為郎傳所云
小蘇學士即東坡而稍變其文耳都尉即詵也俅富貴
不忘蘇氏每子弟入都問卹甚厚亦有可取時梁師成
自詭東坡之子二人皆嬖倖擅權勢而叔黨卒終于小
官可以知其賢矣或謂二蘇黨禁方嚴李公麟遇蘇氏
子弟至以扇障面而過之坡族孫元老上時相啟乃至
云念與黨人偶同高祖此輩愧俅師成不亦多乎

鄒浩
道鄉

集有高俅
轉官制

李肇國史補云御史故事大明朝則監察押班常參則殿中知班入閣則侍御史監奏蓋含元殿最遠用八品其次宣政用七品紫宸最近用六品殿中得立五花磚綠衣用紫案褥之類號為七貴監察院長與同院禮隔語曰事長如事端凡上堂絕言笑雜端笑則合座皆笑謂之烘堂雜端視今之河南道御史所謂南牀也

又云每大朝會監察御史押班不足則使下御史因朝奏者攝之諫院以章疏之故憂患畧同臺中則務苛禮

省中多事旨趣不一故言遺補相惜御史相憎郎官相輕今六科每考選或庶吉士散館之後前輩必先謁後輩意氣較臺銓為洽尚有古意

元世祖至元五年置御史臺秩從二品二十一年陞正二品大德十一年陞從一品大夫

即左都御史

一人後增一

人中丞

即左副都御史

二人後增二人隨復故侍御史二人治

書侍御史二人殿中侍御史二人治朝著之事監察御史十二人後增至十六人皆漢人又增蒙古色目人如

漢人之數今三十二人至元十四年既取送置南行臺
專莅江南之地號江南諸道行御史臺秩如內臺監察
御史二十四人西行臺初治雲南大德元年移治陝西
號陝西諸道行御史臺莅陝西甘肅四川雲南之地秩
如南臺監察御史二十人詳載虞道園題名記陶南村
著于輟耕錄有殿中司有察院

國朝始置都察院滿洲漢人掌院事左都御史各一人
漢人或以內閣大學士出掌院事協理院事左副都御

史各二人左僉都御史一人先用漢軍後漢軍漢人參
用監察御史四十人皆漢人滿洲則曰理事官副理事
官後改監察御史康熙初裁臺省官滿洲監察御史二
十三人漢監察御史二十四人又置漢軍御史八人
郎部
補遷每年二八月御史內陞外轉漢軍亦與漢人並列內
陞京卿或陞內閣侍讀學士

六月以禮部尚書張玉書為文華大學士兼戶部尚書
以工部尚書張英為禮部尚書仍兼掌翰林院詹事府事

右軍黃庭經真蹟今藏

內府康熙某年曾

賜閣臣學士同觀樂毅論真蹟原藏涿州馮氏後歸衍
聖公孔翊宸毓圻康熙二十四年進入

內府孔馮氏甥也

七月初九日以左都御史陳廷敬為工部尚書以順天
巡撫僉都御史于成龍為左都御史自順治已來烏金
超哈為部院之長者自于始

揮塵錄載宋有三李定其一濟南人嘉祐治平已來以
風裁聞嘗遍歷天下諸路計度轉運使官制未行老于
正卿乃敦老如岡之祖其一洪州人字仲求晏元獻公
之甥即興蘇子美賽神會之獄者其一揚州人字資深
元豐御史中丞即與舒亶媒孽坡公者同姓名者三世
或指而為一故明辨之然其二陷二蘇皆小人吾郡先
哲則獨以功名著鄉後學所當知也

權敬中高麗人初學神仙辟穀之術累官尚書禮部侍

郎知制誥與同官李奎報俞升旦等撰偽明宗實錄分
年秉筆敬中議曰臣所編四年之間記災異者凡若干
事謹按春秋二百四十二年記天變者多矣只書日有
食之而不書月食豈以日實也無待而明君象也月闕
也有待而明臣象也取詩所謂彼月而食則維其常此
日而食于何不臧之說忌陽之虧而不忘月闕故歟丁
未七月之日食者即是日而應見矣曹元正石隣之黨
夜犯宮闈而作亂豈非陰侵陽臣犯君之效歟魯昭公

二十四年五月日食梓慎曰水也昭子曰旱也其言曰
日過分而陽猶不克克必甚能無旱乎陽不克莫若積
聚也是歲果旱說者曰二至二分日有食之不為災日
月之行也春秋分日夜等故同道而食輕不為災水旱
而已己酉二月之日食在於春分是以至閏五月而旱
此其應也日赤薄無光日旁有背氣外赤內黃日有東
西珥者各一按前漢書註云日旁氣在旁直對曰珥向
日為抱向外為背背者背象也氣往迫之為薄晉志曰

其君無德其臣亂國則日赤無光天之譴告豈不丁寧乎雖云曹石之輩復有東南之賊縱橫煽亂者故譴告如此當此時而覺悟豈非令終之兆乎月犯昴者五月食昴者三月犯心者二月食心者二月犯心前星者一食心後星者二月貫心而行者一按星傳昴旄頭胡星也為白衣會又天之珥也主獄事心三星天王正位也前星為太子後星為庶子中星為明堂大辰主天下賞罰天下變動心星見祥據此而言上國當有因刑罰失

中之事胡兵殘跡天街波及於外又且天王失位而嫡庶子孫蕩析不振者故罰之所示者如此其多也有國家者宜鑑省焉月犯角左星者三月入羽林者二月犯五車者二月犯箕星者四月入太微者二月入南斗魁者三月食房者一月犯房南星者一月亦如血者一角為天田亦為理主刑則恐有刑法失理而不平者羽林為天軍亦主翼王恐天軍多非其人翼王不謹者乎五車五帝軍舍也恐主軍非人不能嚴毅武勇致撓敗故

歟太微天子庭也月五星入太微軌道吉不識月果軌
道否乎南斗天廟也丞相太宰之位得非丞相太宰不
能寢進賢士稟授爵祿之罰歟房為天府又為天駟而
月掩食者天閑之駟散於非人故罰之所示者如此月
者太陰之精白而明者也今變赤如血者豈非星傳所
謂月變色將有殃者乎歲犯執法者二歲與太白同舍
者一歲犯房上相者二太白與辰星合者一太白入犯
太微者一太白犯南斗者一太白入氐行者一太白經

天者二太白在北熒惑在南犯鎮者一太白在東熒惑在西相犯者一太白在東熒惑在西犯胃者一火入東井者一熒惑入輿鬼者四火犯司怪者一火入軒轅者一填犯歲者一填犯亢者一填入氐者一填犯太微東上相者一辰現房之東北者一按志曰仁虧貌失逆春令傷木氣則罰見歲星義虧言失逆秋令傷金氣則罰見太白星禮虧視失逆夏令傷火氣則罰見熒惑星智虧聽失逆冬令傷水氣則罰見辰星仁義禮智以信為

主貌言視聽以心為正故四星皆失填乃為之動五星之應大抵如此但仁義禮智之虧與貌言視聽之失果誰之為歟將為君天下者之應乎擅一國者之應乎不可不知也星傳月食五星其國皆亡註云其國者分野之國也則當以分野論今不書分野則不可以論其應也又曰太白經天天下革民更王則凡五星之變多是上國之事非本國之變不足懼也氣之變者西方赤氣如火又東南竟天自坤竟天者各一坤方赤氣如火者

一按周禮有眡祲氏之官掌十輝之法以觀其妖祥辨其吉凶而赤祲乃憂氣之所應則當時必有憂患而謀亂者乎五色虹南北相衡者一乾坤二方虹蜺垂地者一白虹見西北方者一太廟蜺見垂地者二按晉志白虹百殃之本衆亂所基又云白虹霧姦臣謀君擅權立威夜霧白虹臣有憂晝霧白虹君有憂虹頭尾垂地流血之象以此鑑戒可也雨土大霧者各二志曰雨不霑衣而有土名曰霾君臣乖君臣道合廓然成泰霾何有

馬霧者衆邪之氣陰來冒陽若白日中天幽枉畢照衆邪之氣安得冒乎流星出入者二十有五星傳曰流星天使也自上而下曰流自下而上曰飛其大者曰奔奔亦流星也漢書註云飛絕迹而去也流光迹相連也其吉凶之應以所出入論大雨電者八按魯僖二十九年昭公四年皆書大雨電左氏記季武子問申豐曰電可禦乎申豐對以聖人在上無電雖有不為災而以藏冰用水之事演之是故冬則陽入於地陰行於外於是有

愆陽故鑿氷而取之洩陽杜陰至春則陽不暴發而無
淒風夏則陰入地中陽發於外將有伏陰故出氷而頒
之助陰抑陽至秋則陰不暴作而無苦雨今我朝藏氷
用氷之法竊恐未盡合於古先請議黑牡秬黍之奠桃
弧棘矢之禳藏之周用之遍則電之災庶可禦矣物之
怪神像頭亡者一官門鵠尾自頽者一神者民之主也
况智異山南紀之巨鎮其神尤為靈異今示其像無頭
者豈非内外人民咸懷無上之意故示以如此欲其省

悟而革心也門者人所出入莫不由之者也今鷓尾自
頽尚宜修省木之變則木介者二蟲食粟葉者二震殿
柱者一傳曰妄興徭役以奪民時則木失其性而為變
怪魯成公十六年正月雨木冰而劉向以謂冰者陰之
盛而水滯者也木者少陽貴臣卿大夫之象也此人將
有害則陰氣脅木木先寒故得雨而冰也或以木冰為
木介介者甲也甲兵象則憂其兵亂粟北方之果蟲食
其葉則北方之臣當憂讒賊震柱亦棟橈之凶可不戒

哉火之變則樞院火者一太倉災者一平壤祠堂災者
一傳曰棄法律逐功臣以妾為妻則火不炎上說曰火
南方揚光輝為明者也其於王者南面向明而理或耀
虛偽讒夫昌邪勝正則火失其性而為災矣明宗早失
配偶中無內主七嬖爭寵五孽招權是以火樞密為示
譴牝雞女謁失於樞機之密也太倉之火示不復畜養
人也平壤祠堂災者示無神也水之變則井水沸流者
一大水者三雪消如血者一傳曰簡宗廟下禱祀廢祭

祀逆天時則水不潤下而失其性說曰水北方終藏萬物者也王者即位必郊祀天地望秩山川懷柔百神此所以順陰陽和神人也明宗四時之享不躬行者有年宜水之為沴也京房易傳曰饑而不損茲謂泰厥災水水流殺人又曰辟過有德厥災水水流殺人已水地生蟲往年關東饑而有司莫以告不舉荒政故今茲之水漂屋者一百流殺人者一千餘豈非泰之罰歟戊申之水水已而生黃蟲黃鼠豈非辟過有德之罰歟石之變

自移者一裂隕者三金石同類其自移與裂隕金失其性也故或說石山之骨也骨已裂隕山亦將崩國主山川而山崩則國將危亡可不戒哉鳥之變雞鳴不鼓翅者一按易說卦巽為大雞酉為小雞又巽主風風主號令故雞號知時巽木含火火生風火炎上故雄雞有冠乃鳴巽者離之再變兌者離之變而巽為股離為羽翰故雞將號動股擊羽翰而後有聲今雞鳴不鼓翅得非知時者非其人墮官曠職之罰乎獸之怪虎入宮者一

豹入城者一犢有兩頭者一虎豹山野之惡獸也今見于宮中與朝路得非將為惡獸之所窟穴乎犢生兩頭者下民不一之兆也大抵世治則天變畧世亂則天變繁道勝之君以人理天德衰然後天亦譴告王者布德行政以順人心則災何不消福何不至哉此奏有董仲舒劉向之風中國士大夫所難備錄之

烏曰雄雌獸曰牝牡然牝雞司晨雉鳴求其牡見于經文者亦可互用高麗史辛禍傳遣密直副使張方平獻

歲貢雄馬十五匹雌馬三十五匹馬亦得稱雄雌也古詩云雄兔脚撲朔雌兔眼迷離詩曰雄狐綏綏

觀李中丞奉倩家周文矩畫五王飲酪圖按宣和畫譜有文矩五王避暑圖四又圖畫見聞志玉堂故事有南唐周文矩五王飲酪圖二元人王惲有五王避暑圖一絕云翠幄留香郁棣華紅雲縈暖鵲鵲沙豆萁不免陳思歎朱李寒泉是浪誇見秋澗集

夢溪筆談載冠萊公好柘枝舞每宴客必舞柘枝舞輒

竟日時人號為柘枝顛朱凌谿詩遙憶風流王柱史西
臺銀燭柘枝顛正用此事陳大樽乃改顛字作前風趣
奇減豈未覩出處耶

古書固有晦于前而顯于後者聞見後錄云神宗惡范
曄之名欲更修後漢書求東觀漢紀久之不得後高麗
以其本付醫官某來上神宗已厭代矣元祐中高麗使
人言狀訪于書省無知者醫已死于其家得之藏于中
秘予嘗寫本于呂汲公家亦棄之兵火中矣又予官長

安時或云鄆杜氏家有江表志英雄傳因為外臺言之
委官以取民驚懼遽焚之世今無此三書矣今荀悅漢
紀與袁宏後漢紀嘉靖間吳郡雕板甚精流傳于世當
是有神物護持之耳

世言蘇黃相訾毀予嘗辨之于池北偶談又見王明清
所記李邕鄆孫亨仲言家有梅聖俞詩善本世所傳多
為歐陽公去其尤者忌能名之壓已也明清辨其非實
以歐公在諫路頗詆邕鄆云爾以歐梅蘇黃四公深相

知而世俗之論尚如此則謂子美贈李詩李侯有佳句
往往似陰鏗太白贈杜詩飯顥山頭云云皆為譏誚者又
何足怪乎

世說有看煞衛玠之語東坡自海外歸毘陵病暑著小
冠披半臂坐船中夾岼萬人隨觀之先生顧坐客曰莫
看煞軾否蓋用世說語為謔也予昔過毘陵借用其語
為絕句云買得蜻蛉小如葉推篷看煞九龍山

周益公玉堂雜記故事交趾其王初立封交趾郡王久

之進南平王死則贈侍中南越王至李天祚又自南平

王特封安南國王上欲厚其禮予請仍贈侍中追封南

越國王

安南志天祚在位三十九年

又云安南為國蓋曾丞相之失其

奏章行移舊止稱安南道加封之後浸自尊大文書稱

國不復可改沈存中夢溪筆談云交趾乃漢唐交州故

地五代離亂吳文昌始據安南後為丁璉所殺開寶六

年歸附授靜海軍節度使八年封交趾郡王此安南封

王之始按安南在明初置布政使司嘉靖中又降為都統使

本朝順治中黎維禔莫敬耀俱求內附未授爵後冊封

維禔子維禧為安南國王

宋孝宗隆興二年交趾入貢賜安南國名

敬耀子

元清為都統使云詳予池北偶談

七月十四日

駕幸古北口外寅刻百官跪送于東華門和碩簡親王
從先是厄魯特與喀爾喀交惡厄魯特興兵侵喀爾喀
地近在邊境七月

命鎮國公蘇努彭春等帥師出張家口和碩康親王信

郡王帥師繼之屯歸化城初六日

命和碩裕親王為撫遠大將軍與皇長子統大軍出古北口至是

駕行十六日安北大將軍和碩恭親王繼行

沈存中筆談內諸司舍屋唯祕閣最宏壯閣下穹窿高敞謂之木天今以翰林署為木天蓋起于宋代

明時翰林官初上或奉使回例以書籍送署中書庫後無復此制矣又如御史巡鹽茶學政部郎推關等差率

出俸錢刊書今亦罕見宋王琪守蘇州假庫錢數千緡大修設廳既成漕司不肯破除琪家有杜集善本即俾公使庫鏤板印萬本每部直千錢士人爭買之既償省庫羨餘以給公厨此又大裨帑費不但文雅也

康熙二十三年

上南巡江南提督昭武將軍楊捷迎

駕慰勞甚至

賜

御書丹誠二大字額揭

御筆二字鈐以

御璽紙尾題康熙甲子冬至前賜老將軍楊捷十三字

又

御書

御制五言一首岐陽方較獵騷裊盡龍媒伏下黃金勒

橫秋號逸材紙尾題咏馬二字皆用

御璽董御史文驥為記

偶于故書肆買得書法源流一帙乃元人傅與礪若金

述范德機語也後附杜詩律格

有接項纖腰
充股連珠等

有元至治

壬戌楊仲弘序畧云少從叔文圭遊成都過浣花求工
部之祠而觀焉有主祠者子美九世孫杜舉居祠之後
造而問之舉之言曰甫不傳諸子而獨于門人吳成鄒
遂王恭傳其法予傳之三子者子從遠方來敢不以三
子所傳者與子言之按舉之名不見于書傳吳鄒王三
子亦不見于諸家誌序中且子美全家避亂下峽不應

復有喬孫畱居成都又所拈秋興燕子來舟中等篇載
三子之說大抵如村學究語如仙侶同舟晚更移一句
解為明王與貴妃諸臣汎舟漢陂可笑至此餘可倒推
第不知仲弘之序何人偽造如醉人夢囈可恨也

舒城縣南有璇源館相傳李伯時別業予過舒行李匆
匆未及訪其遺迹若龍眠山莊則舒城桐城爭之而問
其所在土人皆不能詳偶讀樂城集題李公麟山莊圖
二十絕句聊識其亭館之名于左曰建德館墨禪堂華

巖堂雲鄉發真塢茅館瓔珞巖樓雲室秘全菴延華
洞澄元谷雨花谷泠泠谷玉龍峽觀音巖垂雲沂勝金
巖寶華巖陳彭滌鵲源陸友仁云李伯時嘗讀書龍眠
山故有龍眠書院在舒城縣治東飛霞嶺之北

周靖敕寧說長洲徐枋

昭

法隱居靈巖不入城市湯潛

菴尚書撫吳日屏騶從往訪之避不見潛菴登其堂堅
坐移晷周覽太息而去亦不報謝川湖總督蔡尚書仁
菴自荊州專价致書以黃金為壽求其畫答書而返幣

竟不為作予謂返蔡幣可也湯大儒又有恩德于吳人不往見可也避之則矯矣然予昔在廣陵時年甚少與徐初無介紹特畫靈芝于縑素見寄且題款其上似非泛然者予何以得此于昭法哉予嘗有齋中三咏其一曰天池白雲裏寫此商山姿感君黃綺意勝食齋房芝又金俊明孝章畫梅云鄧尉花時雪幽人日往還生綃才半樹忽憶漁洋山王光承玠石草書云逃名東海上時復帶經鋤自是高人筆非關餓隸書三君皆吳中高

士也孝章于辛亥歲曾親寫陶詩見寄畫梅則壬子寄予兄弟比至西樵已歿聞孝章旋亦捐賓客矣故予有詩云維摩丈室幾黃昏春草閒房日閉門成佛生天兩何處暗香疎影為招魂當年五字寫柴桑又寄孤山世外香一幅生綃千載意也應配食水仙王孝章所居曰春草閒房十笏草堂先兄讀書處也

吳門有夏忠靖周文襄二公合祠蓋忠靖嘗以治水至與文襄皆有恩德于吳者也滄桑之後久堙廢有胥吏

陶姓者自詭為靖節後裔遂即其地改祀淵明淵明之
祀應在豫章或在彭澤東流今祀于吳不典甚矣且攘
夏周之祀尤為不可湯潛菴撫吳日力毀淫祠乃未及
釐正修復可惜也

居易錄卷七

欽定四庫全書

居易錄卷八

刑部尚書王士禎撰

高麗國王僭號仁宗時其國老李資謙擅權兩府兩制
侍從官議資謙不稱臣不與百官廷賀徑詣幕次拜王
答拜金富軾為寶文閣待制獨上奏曰漢高帝初定天
下五日一朝太公家令說太公曰天無二日土無二王
皇帝雖子人主也太公雖父人臣也奈何令人主拜人
臣高帝善家令言詔曰人之至親莫親于父子故父有

天下傳歸于子子有天下尊歸于父此人道之極也今王侯卿大夫已尊朕為皇帝而太公未有號今上尊太公曰太上皇以此論之雖天子之父若無尊號則不可令人主拜也不具侯伏完獻帝皇后父也鄭玄議曰不其侯在京師禮事出入宜從臣禮若后息離宮及歸寧父母則從子禮故父完朝賀公庭如羣臣及皇后在宮后拜如子又東晉羣臣議穆帝母褚太后見父之禮紛紜不一博士徐禪依鄭玄議曰王庭正君臣之禮私覲

全父子之親是大順之道也況外祖乎按儀禮五服制度母之父母服小功五月而已豈得與上抗禮宜令上表稱臣在王庭則行君臣之禮宮闈之內則以家人禮相見如此則公義私恩兩相順矣又欲號資謙生日為仁壽節富軾言稱節自古所無唐玄宗時始稱皇帝生日為千秋節未聞人臣有稱節者觀其論議不愧漢唐宋名臣其兄弟慕富韓公蘇文忠公兄弟而命名誠不虛也

北宋名臣如韓忠獻范文正富文忠曾宣靖晁文元韓忠憲呂正獻諸家父子祖孫相繼鼎盛獨司馬文正公之後寥落不振公無子以從子康為嗣最賢元祐間方欲大用而康早卒子植字公立亦有賢聲早死無子詳邵伯溫聞見錄天道之不可問如此

四朝聞見錄丙集載司馬武子忠節事甚詳大畧云司

馬朴字文秀池之後

父光

以兵部侍郎使北不屈在北生

子名通國字武子蓋本蘇武之意通國有大志嘗結北

方之豪韓玉舉事未得要領紹興初玉挈家而南授江
淮都督府計議軍事其兄璘在北亦與通國善癸未九
月璘以扇寄玉詩云嗷嗷鳴雁落江濱夢裏年來相見
頻吟盡楚辭招不得夕陽愁煞倚樓人都督魏公張見

此詩甲申春遣侯澤往大梁諷璘通國等至亳州為邏
者所獲通國璘與常所與交聶山等三百餘口同日遇
害是歲三月十六日也通國之姪孫振自序其事曰昔
李翰作張巡傳云云吾祖尚書靖康間奉使辭氣激烈

雖不能遏方張之勢而亦足以起其敬畏之心及扈從
北狩不以利動不以死懼高宗加諡忠潔著之國史吾
祖大節無遺憾矣若季父武子一心本朝遽遭屠戮後
韓太監紀其詳王尚書希呂書其略雖未能載諸史冊
而節義之名庶幾不至磨滅云希呂序略云昔我先正
溫國文正公逮事四朝惟忠惟孝忠潔公繼之今通國
又繼之皆以忠義憤發効死異域忠孝之節其萃于司
馬氏乎司馬後人如此其視京檜彌遠之流家勢翔貴

者流芳遺臭為何如耶教陶孫挽趙忠定詩云九原若
遇韓忠獻休說渠家末代孫然則忠獻雖仍世賢相其
後視司馬氏亦有愧色矣

宋時制科以詞賦試士凡用經釋音以首釋為證用史
釋音以末釋為證徐鳳少監代嗣王謝賜玉帶表用禮
記字尹二字以尹為平聲乃用第二音有司謂其失粘
見葉紹翁聞見錄

查嗣琛德尹以雲林畫索題云頃登崧少道輾轅謁登

封宮詹學士逸菴耿先生介于其齋中見此幅歎美不

容口學士言此故同年友顧見山中大所貽吾無所需此

撤以相贈云上方有倪自題詩云江城風雨歇筆硯晚

生涼囊楮未埋沒悲歌何慨慷秋山翠冉冉湖水玉汪

汪珍重張高士閒披對石牀此余乙未歲戲寫于王雲

浦漁莊忽十八年矣不意子宜友契藏而不忍棄捐感

懷疇昔因成五言壬子七月廿日瓚樵李項氏物也朱

竹垞題云房山潑墨太模糊那似倪迂意匠殊一片湖

光幾株樹分明秋色小長蘆吳天章題云經營慘澹意
如何渺渺秋山遠遠波豈但穠華謝桃李空林黃葉亦
無多予亦題二絕句云平生不作王門客莫把倪迂配
米顛最憶推篷寫松石菰蘆秋雨熱龍涎曾上神嵩眺
雒陽碧伊清洛迴蒼蒼怪來舒卷烟雲滿得自盧鴻舊
草堂

史達祖邦卿南渡後詞家冠冕然其人乃韓侂胄堂吏
耳御史中丞雷孝友彈侂胄疏云蘇師旦既逐之後堂

史達祖耿樞董如璧三名隨即用事言無不從公受
賄賂共為姦利葉紹翁記蘇師旦周均等本末云師旦
既逐韓為平章專倚省吏史邦卿奉行文字擬帖撰旨
俱出其手權炙縉紳侍從東札至用申呈有李姓者嘗
與史遊于史几上大書曰危哉邦卿侍從申呈未幾致
黜焉其人品流又遠在康與之下矣

曲阜陳見智力菴以陳留知縣入為兵部主事昭明少
傳文肅劉公野亭文集凡八卷公相武宗以木強聞不

悅于瑾永之黨在位僅三月致仕歸武宗常語于朝曰
劉先生真老乾板也公既歸于南郭積土為山引水為
池構亭其上題曰野亭著樵牧餘音一卷歸來亭曲一
卷此集有郭文簡公朴鄒文莊公守益二序崔文敏公
銑作傳

白樂天作六帖本當時科舉之書通典載唐制帖經者
所以習經掩其兩端中間微開一行裁紙為帖凡帖三
字隨時增損可否不一或得四得五得六者為通蓋取

中帖之數以名其書故曰六帖

元故宮遺錄一卷工部郎中廬陵蕭洵撰有洪武丙子松陵吳節序洵文筆不甚雅馴然有元一代大內規制瞭然可見與楊奐汴宋故宮陳隨應南渡行宮二記皆足備考中堂事記載元丞相史天澤等宴高麗世子植于都堂問其國王世系答曰是唐順宗第十三子逃難而立于此以王家後易姓為王與高麗史所云畧相似蓋其引中國以為重舊矣

海鹽朱朴明嘉隆時布衣其西村詩雖未脫臨摹之迹
亦有佳句因略加揀擇以備盛明時一種七言如數峯蒼
翠寺門迴三月落花溪水深揀花風過蠶蛾老麥秀城空
雉子斑千年玉骨湘纍墓萬里堅城少保家雁來關塞暮
天碧龍起江湖秋水腥巫峽曉風髻短髻楚江秋水練
長裙山園野色迷秦駐海送潮頭上浙江落花時節已
寒食流水陂塘還祓除白雲出岫澹如掃紅藕作花香
可憐月明蒼壁繫仙舫風細幔亭流白雲此例皆佳

唐詩人劉方平河南洛陽人家世最貴政會事高祖太宗為洪州大都督贈戶部尚書封渝國公諡襄四世至裴開元中以功臣後賜進士第官東河縣令子藻金成方平皆有文方平子符戶部侍郎贈司徒八子崇龜崇珪等皆仕宦崇珪子岳後唐吏部侍郎贈司徒子溫叟宋初御史中丞子照贊善大夫烈龍圖閣直學士烈子几登第忱為監司子唐老石正言溫叟嘗求退太祖曰俟選有守道正直如卿者即可代卿嘗獨對明肅太后

謂曰知卿名族十餘世欲一見卿家譜恐吾同宗也

對曰不敢后數問度不可免因陞對佯為風眩仆而出
蓋世有風節如此唐中葉詩人後嗣昌盛者莫如盧綸
而方平歷五代迄宋科名德業相繼又為過之

宋初進士過省殿試尚有被黜者遠方寒士或至赴河
而死仁宗聞之惻然自是殿試不黜落雖雜犯亦收之
末名明制洎

本朝皆遵之仁宗之澤及萬世矣

沈存中云信安滄景之間冬月作小坐牀冰上拽之謂之凌牀今京師尚有此制名凌車其來遠矣

元王惲秋澗玉堂嘉話多有訛舛如錢文僖跋鍾繇墨蹟議事表云尚父嘗寶此帖惲云尚父謂忠懿王鏐按吳越國王鏐諡武肅若忠懿乃假諡也李北海毒熱帖後題觀者黃魯直已下六十九人並列張浮休張舜民不知舜民即浮休也楊凝式小字詩凝式字虛白按歐史凝式附見唐六臣傳陶岳五代史補皆不言字虛白

未知何據柘枝舞本拓拔舞金人以名不佳改之按樂府雜錄健舞曲有柘枝軟舞曲有屈柘樂苑羽調有柘枝曲商調有屈柘枝舞因曲為名又雜見教坊記羯鼓錄唐沈亞之柘枝賦云柘枝信其多妍其本曲首句七字第二第三句皆五字第四句復七字薛能有三首止是五言六句溫庭筠屈柘詞所謂楊柳縈橋綠玫瑰拂地紅則五言律詩也柘枝自唐世已盛傳烏得云自金人始耶宋高宗善書學擇諸王命史彌遠教之孝宗其

一按彌遠寧宗時人安得云教孝宗耶宋曾冊金為東
懷國乃遼冊之非宋也其謬誤大抵如此

王秋澗云海州東入海八百里峽島是龍宮地生海棠
作矮樹花色深紅大如茶盃而百葉香韻殊絕每歲自
島中移百本入海州御園明年再移百本而以先所種
者供御每花一金籤牌記之重九始開昔人謂惟昌州
海棠有香不知海州然云開于九月當別是一種非西
府垂絲之類

濟南長清縣靈巖山寺有元至治元年呼圖克郡王太夫人巴延氏詩云巖前松檜年年綠殿上君王歲歲春

唐魯國顏文忠公一帖云真卿奉命來此事期未竟止緣忠勤無有旋意然中心恨恨始終不改遊于波濤宜得斯報千百年間察真卿心者見此一事知我是行亦足達于時命耳又題十字云人心無路見時事只天知右魯公書并畫像刻石在蒲州有宋人跋云觀此筆蹟

不顯歲月以事實考之蓋使李希烈時也希烈以建中元年陷汝州盧杞建議遣公奉使至貞元元年八月公不幸遇害困躓賊庭者逾二年刃加于頸而色不變度無還期誓不易節蓋書此以自表云重旣摹公之像于蒲繪而祠之又訪得此石本狀貌老矣公以乾元元年自同徙蒲至奉使之時垂三十載氣節不衰而狀貌非昔也乃刻石而寘之祠堂俾觀者有考焉靖康元年七月壬申朝散郎祕閣修撰知同州軍州事唐重書載

崑山顧絳亭林求古錄

葉紹翁四朝聞見錄云湧金門外柳洲上有龍王祠開禧中帥臣趙師霁重塑五王像晁旒珪服畢具其中三像一模韓侂冑像二模陳自强像三模師霁像至今猶存

今俗謂婁之父為岳丈皆云起于張說之子均然漢郊祀志大山川有岳山小山川有岳壻山晉裴松之注三國志言獻帝舅董承謂古無丈人之名故謂之舅則岳

翁丈人之名自漢晉已然不始于唐

八月初八日

車駕還京師內閣九卿迎

駕于東直門外十二里時雨濤已二鼓矣先是大將軍裕親王以諸道兵破厄魯特于烏蘭布通初一日捷書聞

行在次日至京師宣捷午門

常熟趙文毅公萬歷中以詞林劾江陵奪情杖闕下其

孫東田士春崇禎丁丑及第復以詞林劾武陵奪情杖
闕下祖孫一轍而所劾二相君皆以奪情又皆楚人又一
奇也東田之孫廷珪字禹玉康熙庚戌進士與先兄叔
子同年今為御史遺先生保閒堂集因感其家學書
之

范淳祖禹唐鑑二十四卷呂東萊祖謙注有淳自序及
元祐元年二月二十八日上太皇太后及哲宗表三通
明弘治十年知武進縣鼓城呂鏗刻也有刑部尚書白

昂序此書凡三百六篇據自序及表本十二卷伯恭析為二十四卷耳近有石門呂氏刊本

太平治迹統類七十三卷宋眉山彭伯川叔融撰略用袁樞通鑑紀事本末條例前集四十卷中興後集三十卷見陳振孫書錄解題趙希弁讀書附志此前集尚有譌闕乃秣陵焦氏本

兩漢刊誤補遺十卷宋河南吳仁傑南英著蓋因劉敞原父攷貢父刊誤而增補釐正之有汴人曾絳淳熙

己酉序稱其的當精確如目擊東西都事者周益公子
充遺人書曰吳斗南博物洽聞今之五總龜也

康熙二十八年

上南巡視河次淮陽泰州女子蔡蕙上疏訟父冤略云
妾聞在昔淳于緹縈為父鳴冤贖罪漢文帝憐而釋之
載之前史千古傳為盛典今臣妾父被仇害自逮獄已
來妾衣不解帶卧不登牀捐膏粉以誰施棄綺紈而弗
御日夜悲號額天無路每夕遙望

宸闕禮拜千餘於今三年寒暑靡輟唯祝

玉輦南巡妾父盆冤見日今幸

駕臨淮海是誠千載奇逢妾願效緹縈之故事冒死鳴

哀伏惟

天鑒奉

旨下江南江西總督二十九年八月獻上其父免死改
城旦

建炎以來朝野雜記甲集二十卷乙集二十卷蜀井研

李心傳伯微撰編首有國史院劄子行下隆州宣取高
宗繫年要錄指揮孝宗光宗兩朝繫年要錄指揮公牒
三通心傳自序二通此書于宋南渡後朝章國故大綱
細目粲然悉備史家巨擘也

龍泉葉紹翁四朝見聞錄自甲集迄戊集亦纂述南渡
事蹟其間頗有涉煩碎者不及李氏朝野雜記二書皆
鈔本

中秋前二日內閣九卿詣後左門起居予與彭學士羨

門

孫適

接坐兵部李侍郎厚菴

光地

盛談閩中江瑤柱之美

予因問學士浙中蓴菜如何學士答言不知其味予戲謂曰應緣不知其味是以無蓴鱸之思坐皆絕倒

胡震亨云李義山碧城三首蓋咏其時貴主事唐公全多自請出家與二教人媾近商隱同時如文安潯陽平恩邵陽永嘉永安義昌安康諸主皆丐為道士築觀于外史即不言他醜頗著微辭詩中簫史洪崖一聯及引用董偃水精盤事大指已明又劉夢得題九仙公主舊

院詩武皇曾駐蹕親問主人翁前此詩人亦不諱言又何疑于義山耶予謂義山他詩如梁家宅裏秦宮入趙后樓中赤鳳來賈氏窺簾韓掾少宓妃畱枕魏王才一片非烟隔九枝蓬巒仙仗儼雲旗人間桑海須臾事莫遣佳期更後期之類率皆戚里中語亦非泛詠也

王建宮詞每遍舞頭分兩向太平萬歲字當中今外國猶傳其制鄭麟趾高麗史云教坊女弟子奏王母隊歌舞一隊五十五人舞成四字或君王萬歲或天下太平此

金史卷八
卷八
其遺意也

高麗史郊廟朝會雜用唐樂宋太晟樂明雅樂又有俗樂俗樂之名頗有新異聊誌之以廣見聞云舞鼓侍中李混謫寧海得海上浮查制為舞鼓其聲宏壯動動其詞效仙語而為之無尋出自西域歌詞多用佛語西京西京即箕子始封地其民習于禮讓作此歌大同江殷太師箕子封于朝鮮施八條之教以興禮俗人民大悅以大同江比黃河永明嶺比崧山

頌禱其君也 五冠山孝子李文忠所作李齊賢詩曰
木頭雕作小唐雞筋子拈來壁上棲此鳥膠膠執時節
慈顏始似日平西 揚州揚州即高麗漢陽府地繁華
男女方春好遊相樂而歌之也 月精花普州妓名司
錄魏齊萬惑之里人刺之而作 長湍偽太祖王建巡
省民風補助不給民思其德久而不忘 伐谷鳥伐谷
鳥鳥之善鳴者也偽睿宗廣開言路作此歌以諭羣下
也 金剛城偽顯宗收復開京築羅城國人喜而歌之

長生浦侍中柳濯出鎮金羅有威惠倭寇長生浦濯
赴援倭望見即引去軍士悅而作歌 叢石亭奇轍所
作轍元后之弟東還至江陵登此亭臨望大海感四仙
之迹作是歌 處容新羅憲康王遊鶴城還至開雲浦
有一人奇形詭服從入京自號處容每月夜輒歌于市
以為神人李齊賢詩新羅當日處容翁見說來從碧海
中貝齒頰唇歌夜月鳶肩紫袖舞春風 沙里花賦役
繁重託言黃鳥啄粟以怨之李齊賢詩黃雀何妨來去

飛一年農事不曾知鰥翁獨自耕耘了耗盡田中禾黍
為長巖長巖老人譏平章事杜英哲而作 安東紫
青婦人一失其身人所賤惡故作此歌以絲之紅綠青
白反覆比之 濟危寶婦人以罪徒役至濟危寶恨其
手為人所執作是歌以自怨李齊賢詩浣沙溪上傍垂
楊執手論心白馬郎縱有連簷三月雨指頭何忍洗餘
香冬栢木蔡洪哲流遠島作此歌王聞之即日召還
寒松亭世傳此歌書于瑟底流至江南國人張晉公

奉使江南江南人問之張作詩解之曰月白寒松夜波
平鏡浦秋哀鳴來又去有信一沙鷗 禮成江唐商賀
頭網善棋至禮成江見一美婦人乃與其夫賭棋佯不
勝輸物倍夫利之果以妻注一舉勝之舟載而去其夫
悔恨作是歌也 鄭瓜亭內侍郎中鄭叙作已見前李

齊賢詩憶君無日不需衣政似春山蜀子規為是為非

人莫問只應殘月曉星知 風入松

有辭

夜深詞

有辭

翰林

別曲日元淳文

俞

仁老詩

李

公老四六

李

李正言陳翰

林雙韻走筆

金報

冲基對策

劉光鈞經義

閔

良鏡詩賦

金

琴學士儀

玉筍門生

三藏

蛇龍二歌忠烈王狎

羣小選官妓女巫有姿色者籍置宮中時人歌之其詞

古拙有捉搦遺意錄之三藏寺裏點燈去有社主兮執

吾手倘此言兮出寺外謂上座兮是汝語 有蛇舍龍

尾聞過太山岑岑人各一語斟酌在兩心 紫霞洞侍

中蔡洪哲所作

有辭

附著三國俗樂亦錄其目新羅曰東

京

即雞林府

木州

孝女所作

余那山長漢城

紀功

利見臺

羅王失其子得之築臺而歌

百

濟曰禪雲山

婦人望征役而作

無等山方等山

長日縣女子為賊所掠而作

井邑

商婦望夫而作

智異山

求禮縣有女居此山百濟王聞其美欲納之女不從而作

高句驪曰

來遠城延陽

延山府溟州

溟州女子與書生約為婚父母不欲女以帛書屬魚書生烹魚得書遂往諧焉

八月初一日己未朔日食自卯正三刻五分至辰初二

刻五分行救護禮于禮部是日當食不食唐一行曰古

之太平日不食星不孛蓋有之矣月或變行以避日或

五星潜在日下禦侮以救日或涉交數淺或陽盛陰微

則不食或德之休明則天為之隱雖交不食此四者德

教所由生也是歲浙江福建江南江西河南湖廣陝西
四川廣東廣西貴州雲南十二省皆不食

八月十八日

上諭內閣甚欲一見內閣部院大臣先是

駕在塞外偶違和還宮未

御門接見羣臣者十日矣內閣九卿等每日詣後左門
起居聞

旨皆踴躍十九日五鼓集後左門辰刻

上御乾清門有

旨召羣臣入大學士尚書等奏請

聖躬萬安

上微笑頷之仰瞻

天顏神氣充悅羣臣退以手加額相賀

訪唐先生夢濟武于天寧寺觀隋舍利塔坐塔院院僧

出

御書金剛般若波羅蜜經敬觀書法逼真右軍樂毅論

康熙二十七年十二月初八日書版度藏觀音寺


或問溫公于伊川伊川曰君實九分人也予嘗疑立德立功立言如溫公不知欠一分竟在何處晦菴贊涑水先生云篤學力行清修苦節有德有言有功有烈此數語略盡溫公平生恐伊川尚欠一半在

宋趙忠定公汝愚撰皇朝名臣奏議數百卷有淳祐庚戌王孫希濤眉山史李溫二序忠定乞進奏議劄子一通序一通時淳熙十三年也溫陵黃氏所藏宋刻本序

略云伏覩建隆以來諸臣莫盛于慶厯元祐之際莫弊于熙寧紹聖之時方其盛也朝廷庶事微有過差上自公卿大夫下及郡縣小吏皆得盡言極諫無所諱忌其論議不已至于舉國之士咸出死力以爭之然而聖君賢相卒善遇而優容之故其治效卓然士以增氣及其弊也朝廷有大黜陟大政令至無一人敢論議者縱或有之其言委曲畏避終無以感悟人主之意而獻諛者遂以為内外安靜若無一事可言殊不知禍亂之機發

于所伏萬幾餘聞幸賜紬繹推觀慶厯元祐諸臣具詞
直其計從而見效如此熙寧紹聖諸臣其言切其人放
逐而致禍如彼則言路之通塞國家之治亂可以鑒矣
其言可謂深切著明蓋進書在孝宗時也及慶元紹熙
間何澹劉珪輩偽學之說起入黨籍者五十有九人而
忠定為之首遂貶永州紹聖之事不幸再見可勝歎哉
此書載北宋名臣讜論竝議略脩然如丁謂邢恕李清
臣秦檜之流亦點其間豈不以人廢言之意歟

女仙吳彩鸞王惲玉堂嘉話又載其書龍鱗楷韻天寶八年製後有柳誠懸題云吳彩鸞世傳謫仙也一夕書唐韻一部即粥於市人不測其意稔聞此說罕見其書數載勤求方獲斯本觀其神全氣古筆力遒勁出於自然非古今學人可及也時太和九年九月十五日題其冊共五十四葉鱗次相積皆留紙縫研比雜志云宇文廷臣家有吳彩鸞玉篇鈔書一先為廿三先廿四仙不可曉又導江縣迎祥寺有彩鸞書佛本行經六十卷



居易錄卷八

欽定四庫全書

子部

居易錄卷十九

詳校官侍讀_臣陳崇本

員外郎_臣牛勣文覆勘

總校官中書_臣朱 鈐

校對官中書_臣方大川

謄錄監生_臣范光謙

欽定四庫全書

周易錄卷九

刑部尚書王士禎撰

邾世家一卷雜采春秋及三傳國語為之年表一卷起
己未周平王四十九年魯隱公元年終癸酉周元王八
年魯哀公二十七年凡二百五十五年會盟戰伐之蹟
具焉其自序以為以邾繫魯以魯繫周以周繫天元末
朱右作也右字伯賢臨海人洪武初預修元史官至晉
府長史有白雲集

梁溪門人秦道然言倪元鎮故居今為祇陀寺在無錫縣東南二十里所謂雲林堂清閼閣故址皆在寺至今猶多梧桐梁溪有潘氏者與元鎮友善家藏其真蹟甚富今亦散在人間矣元鎮之族今為鄉世以貨殖貴雄里中士人甚少其家有元鎮寫真上有張伯雨楊廉夫柯敬仲輩題贊具存

元制左右詹事正二品太子詹事從二品翰林學士承旨同副詹事正三品翰林學士知制誥修國史集賢學

士同國子祭酒從三品翰林集賢侍讀侍講學士同太
子中庶子中允左右諭德正四品翰林集賢直學士俱
從四品翰林集賢待制國史國子司業俱正五品翰林
集賢修撰從六品翰林國史院編修官檢閱官正八品
元制御史大夫正二品御史中丞從二品六部尚書正
三品侍御史六部侍郎正四品給事中同修起居注知
登聞鼓院同治書侍御史正五品監察御史殿中侍御
史正七品

避暑錄云劉原父集百七十五卷貢父集五十卷

庚午順天鄉試考試官翰林院侍講學士王拱編修魏希徵同考試官知縣何訥等十五人舊例順天鄉試考

試官例用編修檢討皆史官也武試則用侍讀侍講

康熙

戊午武鄉試予以侍讀為正主考官侍講韓公元少副考特用講學防揣摩也同考

例用京官員外郎主事中書舍人行人等官用外官自是科始

都察院為臺員內陞外轉事奉

旨常翼聖著內陞李時謙著外轉

安南志二十卷安南人內附元奉議大夫僉歸化路宣撫司事黎崱字景高撰曰漢交州九真日南刺史太守三國時制守唐安南都督都護經略使交愛驩三州刺史趙氏世家五代時僭竊丁氏世家黎氏世家李氏世家陳氏世家郡邑山川學校官制章服刑政兵制人物物產之類悉具有察罕程鉅夫元明善龍仁夫歐陽玄許有壬序崱自序一通未有敘事述家世官階及內附

顛末甚詳

安南志第十八卷載安南人詩皆近體內附安南國公
善樂老人山園云不是文公逃晉難庶幾微子慨殷亡
大明殿侍宴云雍容湛露歌詩什彷彿鈞天入夢魂還
國云幾年去國杳雲沙身寄狨鞍暫到家簇簇樓臺空
日影盈盈珠翠各天涯真成東海歸遼鶴敢望南門入
鄭蛇人物淒涼何處問江風吹老荔支花送天使張顯
卿云四方專對詩三百五嶺歸來路八千陳聖王挽宋

臣陳仲微云無端天上編年月不管人間有死生萬疊
白雲遮故國一堆黃壤蓋香名陳仁王竹林大士饋天
使張顯卿春餅云柘枝舞罷試春衫況直今朝三月三
紅雪雕盤春菜餅從來風俗舊安南和喬元朗云馬頭
風雪重回首眼底江山小駐驂陳英王送天使李景山
云五嶺山高入未度三湘水闊雁先歸老國叔昭明王
樂道先生贈天使柴莊卿李振云北闕衣冠爭祖道南
州草木盡知名內附封輔義公陳粹山登岳陽樓云烏

沈谷口千林暝龍戰波心六月寒安撫使賴益歸賡叅
議許公東山飄然樓詩云秋興亭前月上時滿樓山色
索題詩心如柳絮沾泥早身似蓮花出水遲經卷已輸
居士樂酒尊宜與可人期倚闌看遍郎湖景塵俗紛紛
總不知前詩尤有佳句內附中朝一統有今日南國
小臣如此江喜詔云黃雞催曉唱玲瓏尺五飛來紫禁
中遂使堯言布天下始知漢詔感山東侍宴云元年新
紀黃龍瑞重譯今傳白雉來都城云寒盡苑花初著蕊

春深宮柳已藏鴉重九懷張憲使云猶思馬上西門哭
不記螯邊左手持贈趙郎中云梅花南北路篁竹短長
亭送侍郎智子元云桂林南去接交州柳葉桃榔暗驛
樓使者持書臨絕域侍郎鞭馬照清秋元年詔下黃龍
漢九譯人歸白雉周便化文身作章甫歸來陸賈說前
旒送傳與礪云滄海龍飛天子詔青冥鶴下趙王臺諸
溪篁竹參差動五嶺梅花次第開用載道韻晚遊郎官
湖云鷗邊人立城陰晚柳外花明水淨時大別山禹栢

云神功四載殷周上元氣一枝天地間題桂林驛云千里鄉心蝴蝶夢一船秋色鷓鴣聲雖中州士人無以過之

明永樂間胡廣等奉詔撰五經大全皆鈔錄前人成書竄易其名易則董楷董鼎董真卿詩則劉瑾書則陳櫟春秋則汪克寬李太宰默續孤樹裒談曾言之

錢武肅王常作金銅佛塔以金萬片聚成之宋姜堯章嘗得數片其友周文璞為賦長句所云錢王納土歸京

師流落多在西湖寺者是也今嘉禾白蓮寺尚藏其一
上刺放下屠刀立地成佛公案周實說

謚法貴一字二字其說不一如歐陽永叔初欲謚文以
配韓退之而常秩增一字為文忠議者以為必留此以
待王安石已而果然朱元晦太常初擬謚文正上謚也
考功劉彌正謂先生當繼唐韓文公宜特謚曰文詔從
之自後周程張呂諸儒遂皆用一字此謚貴一字也京
鏜謚文穆其子沆請避家諱改文忠言者以為楊億鉅

儒既謚曰文議者欲加一忠字竟不之與加一字猶不
可況二字極美乎此謚貴二字也二說不知何者為是
崇禎九年漢中人劉一真入終南山採藥遇仙人自言
是徐元直令一真奏事有旨下撫按察訪成都費經虞
有詩云傳聞徐元直尚在南山雲我欲從之去高峯麋
鹿羣

經禮補逸九卷祁門環谷汪克寬著洪武二年臨江曾
魯序弘治中少詹事程敏政序其書蓋本朱子經傳通

解之意別為義例以吉凶軍賓嘉為綱條目甚晰集儀
禮周官大小戴記易詩書春秋傳孝經家語及漢儒紀
錄凡有合於禮者各著其目列為五禮其自序大略如
此環谷之學受於雲峰胡炳文可堂吳仲迂受春秋於
嚴陵吳朝陽其祖東山先生華字榮夫受經於饒雙峰
雙峰為黃勉齋高第弟子勉齋朱子之門人朱子修三
禮以喪祭二禮屬勉齋其淵源授受如此環溪著書別
有春秋纂疏考異左傳分紀刻於閩綱目考異刻於祁

其易傳義音考二十六卷詩集傳音義會通三十卷周禮類要若干卷四書音證十卷未刻近門人汪比部懋麟刻環谷集惜未覩諸書之全

畫繼云李伯時畫多以澄心堂紙為之不施丹粉不用縑素倪雲林蓋取法於此

蘇叔黨最工畫晁以道誌其墓云書畫之勝克肖似其先人又時出新意作山水遠水多紋依巖多屋木皆人跡絕處並以焦墨為之此出奇也藥城公嘗稱其孝云

先祖方伯府君晚年嘗懸六賊戲彌陀圖於堂壁先祭

酒府君亦然

在揚州余氏女子韞珠繡此圖最工

畫繼云燕龍圖曾孫興

祖家有龍圖公忍事敵災星圖命意甚佳但不知若為

命筆又閩中林退菴尚書歸老子孫請教但云學喫虧

今霸州郝氏自戶侍公傑以學喫虧三字揭堂額其子

恭定公惟訥世守之恭定丁亥進士官至吏部尚書弟

惟謙丙戌舉人監察御史惟諤江西布政使司叅議惟

謙子士鈞戊辰進士翰林院庶吉士弟士鎔舉人戶侍

公弟位舉人子惟訓壬辰進士廬州府推官惟謨癸丑進士內閣中書舍人都人以為盛德之報聞

駕至霸州嘗幸其第親見之云

米芾畫史云潁州公庫顧凱之維摩百補是杜牧之摹寄潁守本精彩照人是小杜亦工畫也又圖畫聞見志潤州甘露寺有謝靈運畫歷代名畫記宣和畫譜皆不載其名

一說易者廬蠓之名蜥蜴是也身色一日十二變易者

取其變也彖者狶神之名茅犀是也犀形獨角知幾知
祥彖者取其幾也象者大荒之獸人希見之按圖而想
其形耳象者取其想也卦者挂物之杙也爻者交疏之
牕也卦取其示爻取其交互而旁通也右說殊穿鑿未
覩出於何書

華陰宗人宏撰山史博物君子也寄所著十七帖述并
注極雋而核述云此帖前人謂皆與周益州者周名撫
字道和永和三年桓溫攻成都李勢降以撫代毋邱興

為益州刺史進爵建成公征西都護進鎮西將軍在官三十餘年有惠政卒蜀人廟祀之帖中多言蜀事又按淳化帖有一帖云周益州送此邛竹杖卿尊長或須此今送則此帖謂是與周者可信而中有數帖非與周語來禽帖宋僧邦詩謂與桓宣武楊用修四川志只載八帖是與周則謂此帖皆是與周者亦不然也帖凡二十有七以第一帖首字名篇故曰十七帖張彥遠法書要錄云十七帖長一丈二尺即貞觀中內本一百七行九

百四十三字是烜赫著名帖也黃長睿東觀餘論云十七帖多臨本永禪師虞世南褚庭誨臨字皆不甚遠故書有數本皆不同南唐李後主勒石澄心堂者乃賀知章臨本宋魏泰家有硬黃本淳熙秘閣續帖亦有刻淳化帖刻多殘缺今世所傳雖非皆右軍真蹟然皆出於右軍要皆不及唐人摹刻弓尾有敕字及解禡勒定者為佳也山史工書嘗刻華州郭宗昌金石史家藏漢唐已來金石文字甚富古文辭亦嫻雅康熙己未以博學

鴻儒徵至京師居城西昊天寺不謁貴遊以老病辭不
入試罷歸嘗攜示蘭亭湍流帶右天五字未損本唐棣
水仙圖乞予作長歌同觀者施侍讀愚山也在關中蓋
張芸叟一流人

書家謂索靖有一筆飛白書畫家謂戚文秀畫清濟濯
河圖中有一筆超騰回摺逾五丈通貫於波浪之間予
謂文家亦有此訣惟司馬子長之史韓退之蘇子瞻之
文杜李韓蘇之歌行大篇足以當之

門人嘉善魏坤禹平持水村圖求題予為作四絕句云
云朱竹垞詩云綠蘋不礙板橋椿紅葉常堆老樹腔他
日相過任風雨抽帆直到讀書窓又跋云通川錢德鈞
居魏塘趙承旨為作水村圖予嘗見其真蹟信墨寶也
禹平以水村自號吳江徐虹亭檢討亦為作水村圖予
題之云鷗波亭子趙王孫曾為錢郎畫水村過眼雲煙
難再覩披圖彷彿筆蹤存斜插魚標颺酒旗柳陰小犬
吠芭籬歸田最是汾湖好我亦相期作釣師既而禹平

復至京師屬李南溟上舍又作此卷按德鈞當日亦有
二圖承旨作之於前薊邱李息齋為之於後何古今人
事之相類也姜西溟詩云通志堂前前日見生綃一幅
似桃源不知神物歸何處留得青衫舊酒痕跋云曾見
松雪公水村圖主人零落此圖遂不可復問矣或云已
入祕府予一日入朝待漏偶與陳說巖大司空談及云
曾於大內見松雪真蹟後有元人題跋甚多蓋即姜所
云也

九月二十三日

上御乾清門召九卿奏事舊例六部都通大分曹次第
上殿是日侍衛傳

旨九卿一同入奏蓋

上初愈未可久勞也

吳道子畫鍾馗以左手捉鬼右手抉鬼目有得之以獻
蜀主者蜀主甚愛之常張於卧内一日召黃筌曰若用
拇指掐其目愈有力令筌改之筌請歸私室數日別畫

用拇指者并吳畫以獻蜀主問之對曰道子畫鍾馗一
身之力氣色眼貌俱在第二指臣今所畫一身之力併
在拇指以故不敢輒改蜀主嗟賞其言此雖論畫實文
章家要訣也

門人潛江朱載震悔人為顧舍人貞觀梁汾以竹鑪卷
索詩王舍人孟端物也鑪在惠山聽松菴吳文定及見
之與盛侍郎冰壑賦詩相倡和程篁墩謝文正倪文毅
皆和錢鶴灘跋共為一卷文正篁墩書甚佳但詩限於

韻亦成弘前風氣然也匏菴紀事云己亥之春予過無
錫遊惠山入聽松菴觀竹鑪酌第二泉煮茶嘗賦詩紀
其事今刑部侍郎盛公無錫人也謂鑪出於故王舍人
孟端制古而雅乃倣而為之且自銘其上其姪虞字舜
臣性尤好古來省其伯父不遠數千里攜以與俱予獲
觀焉因取前詩次韻賞之詩不具錄前有孟端畫山水
題云九龍山人王翬為真性海上人製上人者聽松菴
主僧也卷首有李西涯篆書竹鑪新詠四大字

同年長洲汪鈍翁琬以庚午十二月十三日卒汪狷急多忤交
友罕善終者雖予以至誠交之亦不免其齟齬予終不較也海
內交知甚多至於議論有根柢終推此君汪官止翰林編修云
十月朔午門

頒賜康熙三十年新歷是日相國真定梁公招同李
容齋大司馬杜肇余大司寇陳說巖大司空小集
蕉林書屋觀黃大癡九峯雪霽圖至正九年年八十
一為班彥功作氣韻深厚神品也又趙松雪真草千

文有袁永之董思白二跋北宋人洛陽耆英會圖一卷
會中十一人圖止八人後書耆英會序文三橋兄弟跋
定為溫公手蹟有延祐二年日子昂觀題字

浙江巡撫揭中有地名狗葬不解何義周石公中丞云
秦檜墓也

姜西溟云嘗於吳門董姓家見南唐澄心堂法帖六冊
真祖搨也後三冊歸吳江徐翰林鉉電發以八十金粥
之王少宗伯涓來其三冊不知流轉誰氏矣

此帖吳天章曾攜示

予又有宋縣晉
宗奇談一書

又宋刻江西宗派圖圖如年表世系之

例後再過則已亡之矣

西溟家有范中立長江霽雪圖崔白郭索敗葦二圖又有巫山十二峰英石一長可三尺許奇秀天成後歸張叅議能鱗

西山清涼寺有無名子題詩甚高古竹垞為予誦之詩云山僧汲空潭驚起二龍子十里雲冥濛三日雨不止
宋趙與峕賓退錄云漢世重錢宣帝元康間穀石五錢

金城湟中穀斛亦不過八錢惟元帝永光二年歲比不登京師穀石二百餘邊郡四百關東五百而其先初元二年齊饑穀石財三百民已多餓死王莽時黃金一斤直錢萬朱提善銀八兩直錢一千五百八十他銀八兩直一千而已高帝賀呂公綽曰賀錢萬呂公大驚若今世十千何足驚也惠帝元年民有罪得買爵三十級以免死應劭謂一級直錢二千凡為錢六萬武帝天漢太始間募死罪入贖錢五十萬減死一等雖數逾惠帝時

八倍然後世正使匱乏亦何肯出此令至成帝鴻嘉中
買爵又殺而為千錢可見當時錢之難得也近自洋銅
不至各布政司皆停鼓鑄錢日益貴銀日益賤今歲屢
經條奏九卿雜議究無良策即每銀一兩抵錢一千之
令戶部再三申飭亦不能行官民皆病然視漢時猶霄
壤矣豈漢之金銀充溢如泥沙耶觀史漢所言黃金動
輒數十斤後世抑豈能有此

左都御史于公振甲

成說瀛臺蠶房有綠蠶視常蠶差

小作繭碧綠色遼東種也

偶約座客賦琴魚詩姜宸英西溟吳麐仁趾魏坤禹平

作皆佳姜詩云枯藤雙倚退食餘折柬相召一事無坐

中惟有城西朱垞竹且喜南榮日曝書軟語移時動深酌

仰看參橫挂屋角閒徵瑣細到蟲魚飮盤遙數江南樂

不見涪翁句春網薦琴高千里誰封裏致此溪中毛神

仙風味遺爾雅自得新詩更蕭灑中丞先有長句儂家本佳扶

桑東扶寸的樂連杈筇海艷之味將無同海艷甬東產酷肖此魚

勿訝鄉物輕比擬為公多致為佳耳他日徵公海艷詩
但言此心已馳彼吳云憑誰封寄到京華下筯猶憐道
路賒怪底人誇風味美年年春漲食桃花魏驀山溪詞
云桃花潭近千尺揉藍早一曲是琴溪過清明腥風吹
到仙人去後水族也留名鱗影細浪痕圓翠網都收了
騎鯨無分客裏銜杯好玉椀忽擎來最堪憐小於白
小脆能下酒不用鱠銀絲除非並箭頭魚風味輸多少
按賓退錄云涇縣東北二十里有琴溪溪側有石高一

丈曰琴高臺有廟存焉溪中別有一種小魚相傳琴高
投藥汁所化號琴高魚歲三月數十萬一日來集舊以
入貢乾道中始罷前輩多形之賦詠梅聖俞歐陽文忠
公王禹玉皆有和梅公儀琴高魚詩梅詩云大魚人騎
天上去留得小鱗來按觴吾物吾鄉不須念大官常膳
有肥羊歐云琴高一去不復見神仙雖有亦何為溪鱗
佳味自可愛何必虛名務好奇公儀元倡未見禹玉人
不足道詩句亦平平歐梅大手二絕句乃傖父面目以

今視昔孰謂古今人不相及耶錄又記汪彥章些字韻
古詩頗勝諸作

十月安慶巡撫江有良咨工部言懷寧縣民楊子育漁
於陶鳶夾湖獲巨蚌剖之得大珠一顆如龍眼核重六
錢四分非民間所宜留咨送代進

于總憲振甲傳三祕方云皆有奇驗治噎食倒食症一
方用真柿霜拌稻米蒸飯食之八日不飲滴水效又一
方用虎肚燒末存性好酒調服效治傷寒症用糯米粽

無棗者和滑石末研成錠曝乾燒炭浸酒去炭熱飲之
不論七日内外皆效七日内者即汗七日外者次日汗
侯鯖錄載紹聖中貶東坡毀上清宮碑令蔡京別撰有
人過臨江驛題二詩不書姓名或云江鄰幾或云張文
潛作也其二云晉公功業冠吾唐吏部文章日月光千
載斷碑人膾炙不知世有段文昌此詩因坡公而發特
以退之淮西事為譬非元和間人作也其言吾唐者是
時黨禁方嚴故託之前代云爾以為直言淮西事者誤

婁堅以為東坡詩尤誤矣

豫章集詩命輕人鮚蠻頭船日瘦鬼門關外天北人墮
淚南人笑青壁無梯聞杜鵑或云李白歌羅驛詩夢中
為魯直誦之蓋寓言也侯鯖錄以為少游南遷度鬼門
關作首句作身在鬼門關外天墮淚作慟哭末句作日
落荒村聞杜鵑趙德麟及與黃秦游不應有誤然山谷
書歌羅驛尚有二篇而此詩絕類山谷與少游不類且
少游謫藤州人鮚鬼門亦非所經之路也錄所載改數

字不及黃本遠甚

坡公吳興飛英寺詩起句云微雨止還作小牕幽更妍
盆山不見日草木自蒼然古今妙絕語然不若截取四
句作絕句尤雋永如柳子厚漁翁夜傍西巖宿只以欸
乃一聲山水綠作結當為絕唱添二句反蛇足而聾者
顧深贊之可一笑也予嘗定故友程職方周量詩愛其
一首云朝行青山頭暮歇青山曲青山不見人猿聲相
斷續云云刪作絕句其妙什倍此可為知者道耳

東坡云歲行盡矣風雪淒然紙牕竹屋燈火青燐時於此中得少佳趣予平生嘗於歲寒風雪時領略此一段風味自謂雖三公不易然沈酣富貴人或難語此

十月二十八日予蒙

恩遷兵部右侍郎專理督捕事務往昭趙少宰玉峰

士麟

趙前以江寧巡撫內遷督捕侍郎有美名故往請益趙曰比年條例已極寬大吾輩更當推廣

朝廷德意行之某在督捕三年只以功過格計之日行

幾善事則夜卧始安否則寢亦不寧也久之反以得行
善事為樂而忘其官之久也仁人之言哉趙雲南澂江
人甲辰進士子宸黼庚午新榜舉人

吾鄉刑部侍郎念東高公珩下筆妙天下而留意二氏
之學生平撰著不減萬篇常廣東坡勸爾一杯聊復醉
人間貧富海茫茫之意作小詞八首雖出遊戲亦絕調
也偶記一二於此云亭長歸來屯萬乘大風雲起飛揚
數行泣下美人裳楚歌為若舞何似在烏江銅雀雙鸞

春宛轉挂釵便到分香西陵歌吹為誰長一杯聊復醉
啼笑海茫茫送客白衣者短劍羽聲擊筑相將雪園寒
月倦遊梁夷門虛左地春暮綠蕪長香水吳宮多少恨
魚腸酒後如霜姑蘇麋鹿亦荒涼一杯聊復醉恩怨海
茫茫楊柳春風何婀娜幽蘭瑟瑟秋霜江潭憔悴子蘭
狂世情雙燕子隨處得雕梁驚道碧紗新姓氏大槐爭
鑄金章木棉菴近半閒堂一杯聊復醉榮悴海茫茫野
外秋蓬風外絮一生萍海中央青衫紅淚弔潯陽江雲

天漠漠楓樹夢蒼蒼漢月秦關秋雁斷短歌對酒河梁
西風班馬玉鞭長一杯聊復醉離合海茫茫不盡江潮
鐵綽板商歌玉樹秋江莓苔因雨上宮牆金仙留剝淚
百度續沾裳汾水年年秋雁去雷塘楊柳含霜漁歌樵
唱下斜陽一杯聊復醉興廢海茫茫又三首不及錄使
明皇聞之必歎為真才子也

元仇遠字仁近興觀詩集有年嘯方鳳二序俞希魯蘇
霖王洪胡儼瞿佑諸人跋尾此集仁近手錄以贈盛元

仁者僅律詩三十八首又書贈士瞻上人律詩十首皆
釋子題跋道行其一也別有三十首亦皆近體仇號山
村南宋遺老有詩名格調靡靡遠在趙子昂之下閭妃
園池春日田園雜興此詩見月泉吟社石屋洞數首差可觀仁
近有句云咸平處士真堪羨死守梅花住裏湖有味乎
其言之也

己巳正月

南巡視河士禎以少詹事兼翰林侍講學士家居迎

駕於德州四奉

溫諭蒙

上尊天廚之賜已述紀

恩錄一卷備載其事矣十一月初七日會議端門李少

司馬厚菴語予云是日蒙

上賜謝

恩散歸後

上諭侍衛云王某如尚在外可召令入見侍衛傳

旨則士禎已入城矣復命

上云既回不必往召

上之恩遇至此此前錄所未及謹識於右以示子孫世勿忘

以太常寺卿胡昇猷為都察院左副都御史前刑部尚書也僉都御史周之麟為太常寺卿左通政陳肇昌為僉都御史

以宗人府府丞年遐齡為內閣學士兼禮部侍郎以太

僕寺卿魏雙鳳為宗人府府丞左通政李元振為太僕寺卿李甲辰及第第二人前繼予為國子祭酒

禮部尚書張英罷仍以禮部侍郎掌翰林院詹事府事以熊賜履為禮部尚書前武英殿大學士

居易錄卷九